

第五章 畜養貓狗

▲事鈔云『或畜貓狗、專擬殺鼠。是惡律儀。雜心云、惡律儀者、流注相續成也。善生成論、若受惡律儀、則失善戒』。資持釋云『初顯過。雜下引示流注者惡業、徧也。相續者念念增也。所以然者、由被害心非止一境、復無時限故。善生成論、失善戒者惡勢強也。惡業順惑、勢力猛盛、一切善戒並絕相續。故有云、且望一類鼠上善戒不續、非謂餘戒俱無。又云、此乃誠勒之切耳』。見事鈔記卷七

▲輕重儀云『養畜貓狗、專行殺害。經論斷在惡律儀、同畜便失善戒。出賣則是生類業障。更深施他、還續害心。終成纏結。宜放之。深藪任彼行藏。必繫之。顯柱更增勞役。但依前判、彼我夷然。便息生殺。怨家新樹。慈

悲聖宅』。見量處輕重儀卷上

上來離諸非法中第五章畜養貓狗竟

上來別行篇中第五門離諸非法竟

第六門 出家宗致